



VALESIAE

PRIMA TABVLA olim Sedunorum patria, inter grandes al-
pium fauces continetur, conclusa undiq; altissimis & ad coelum
usq; porrectis montibus, nisi quod apud Agaunensiũ uetustissi-
mum uicum, natura inter saxorum præcipitia exitum quendam
reliquit, sed quem ars ipsa arce quadam & geminis portis sic ob-
struxit, ut hyberno tempore nulli extero homini pateat ingres-
sus in hanc uallem, nisi quem Sedunorum gubernator, qui in ar-
ce ipsa residet, introire permiserit. Extenditur autem hæc regio
secundum cursum Rhodani ab ortu solis ad occasum longissi-
mo tractu, quippe qui complectitur à fontibus Rhodani usq; ad
memorata arcem, iter quatuor dierum. Loquuntur incolæ
pro maiori parte Germanicè, à Seduno uero urbe Metropolita-
na & deinceps utuntur Sabaudiensi lingua, hoc est, Gallica,
tametsi Galli dicant, illam plurimum esse corruptam. Præsi-
det regioni Episcopus Sedunensis, cui Carolus magnus dicitur
dedisse hunc comitatum. Scaturiunt ex montibus geminæ ther-
mæ, Leucenses scilicet & Brigeneses, quæ & ab exteris frequen-
tantur ob earum salubritatem. Habet unam duntaxat ciuitatem,
nempe Sedunum, sed multa insignia oppida non murata, inter
quæ hæc septem principatum tenent, Sitten (hoc est Sedunum),
Syder, Leugk, Raren, Visp, Bryg & Goms. Ipsi uocant Cente-
nas, lingua sua Zenden, habentq; suos præfectos & iudices, quos
à suis electos, Episcopus confirmat. De fertilitate huius uallis
in sequenti tabula nonnihil dicemus.

